



Blera lavur per la giagliina che ova bunamain in ov il di en sia curta vita.

FOTOS ANDREAS CADONAU

Planisar la producziun d'ovs

Igl è fitg pretensius da planisar la producziun dad ovs per cuntentar ils basegns da la clientella durant il temp da Pasca. Ils manachis gronds che produceschan ovs cun 2000 e dapli giaglinom ston s'adattar a la planisaziun dal commerzi dad ovs. Quai vala per exempel era per la famiglia Uffer da Cunter che tira pulschains.

ANDREAS CADONAU/FMR

«Tegnair l'equiliber dal martgà dad ovs è ordvart pretensius.» Quai scriva la gasetta da la bransch da bio e fa attent a la dumonda per ovs che crescha mintgamai durant Pasca e Nadal e che tschesa la stad. A quella dumonda stagiunala da consumatas e consuments èn tut ils producents dad ovs suttaimes en Svizra e betg sulet quels da bio.

Passa 197 ovs per persuna ha mintga Svizra e Svizzer mangià en media l'onn 2024 scriva l'Uffizi federal d'agricultura. E mintga tschintgavel ov è in ov produci tenor las prescripziuns da Bio Suisse.

Ils plans fan auters

E da quels ovs bio producescha la famiglia Alpiger a Rueun. En duas stallas tegnan ils Alpigers mintgamai 2000 giaglinas. «Cun la planisaziun hai jau da far nagut», di Markus Alpiger. Ina part dals ovs vendan ils Alpigers en l'atgna butia sin il bain puril, ad autras butias en la regiun u era a la gastronomia. La plipart dals ovs dal bain puril van dentant ad in martgadant.

«Il commerziant da noss ovs decida cura che las stallas vegnan svidadas e cura ch'ellas vegnan puspè plenidas cun giaglinas.» Markus Alpiger fa attent ch'il commerziant stoppia coordinar la producziun dals ovs da tut ses producents sur l'entir onn per pudair cuntentar ils basegns da la clientella. Ina sfida da furnir avunda ovs cura ch'il giavisch da cumprar ovs è grond sco per exempel avant Pasca. E sche las giaglinas svizas na mettan betg ovs avunda, gidan las giaglinas da l'exteriur. Tenor la gasetta da la bransch da bio vegnan da tscherch temp er importads ovs bio. Dentant betg per consumar directamain, mabain ovs duvrads per producir mangiativas.

Il pretsch s'augmenta

Ch'il pretsch da l'ov bio crescha proximamain per quatter fin sis raps n'ha betg da far cun la



Radund 197 ovs per persuna ha la populaziun svizra mangià l'onn 2024, tants sco anc mai.

mancanza dad ovs actuala en l'Europa. «Tar nus sa drizza il pretsch da l'ov al pretsch dal pavèl da giaglinas e berg a la situaziun da dumonda e purschida.» Che Markus Alpiger ed ils ulteriurs producents da bio pretendan sin il pli tard a partir da l'onn 2026 dapli per l'ov bio ha da far cun ils pulschains masculins: «Ils pulschains masculins na dasgan betg pli vegnir dismiss a partir da l'onn proxim.» Markus Alpiger fa attent che la bransch da bio haja introduci il sistem dal far cot. Per mintga giagliina che ova sin il bain puril dals Alpigers sto insanua auter vegnir engraschà in cot.

Il commerziant dad ovs da la famiglia Alpiger ha gia instradà il sistem nov che ha anc ulteriuras consequenzas per ils producents dad ovs da Rueun/Gula. Las stallas dals Alpigers na vegnan betg svidadas duas giadas l'onn sco ulteriuras grondas stallas da giaglinas. «Las giaglinas ovan tar nus durant 18 mais.» Quai augmenta il ristg per ils producents. «Pli veglias che las giaglinas èn e pli pauc ch'ellas ovan», di Markus Alpiger. En regla dasgan ils producents dad ovs quintar cun 0,95 ovs per giagliina e di. Quest dumber tschesa dentant pli veglias che las giaglinas vegnan.

Impedir la surproducciun

Durant ils onns da corona è il consum dad ovs creschì en Svizra. Per sbassar l'onn 2022 puspè. «Per gular la surproducciun dad ovs avain nus lura stui laschar durant in tscherch temp vidas las stallas da giaglinas.» fa Markus Alpiger attent. Dapi lura èn ils producents dad ovs precauts. Markus Alpiger manegia che la mancanza dad ovs actuala haja era da far cun las mesuras da l'onn 2022. «Las stallas da giaglinas n'èn anc adina betg plenidas complettamain.» I na dovra numnadamain betg sulet producents dad ovs, mabain era manachis che train pulschains. Ed era quella producziun sto vegnir planisada.

Quai conferman Sybille e Mirco Uffer che train 4000 pulschains da bio a Cunter. «Il furnitur dals pulschains decida cura ch'els pulschains vegnan en stalla.» di Sybille Uffer. Els vegnan en la vegliadegna dad in di e stattan 18 emnas a Cunter per silsuenter far il viadi tar ils producents dad ovs. «Per regla cumenza la giagliina ad uvar en la vegliadegna da 20 emnas.» Daspera tegna la famiglia Uffer anc 400 giaglinas ed ils ovs da quella giagliina venda Sybille Uffer en sia butia u a butias ed ustarias en la vischinanza. «Cler che jau stoss era planisar mias furniziuns per Pasca.» Sco quai che Sybille Uffer tradescha, è quai dentant pli simpel cun 400 giaglinas e cun vendita directa.

BRINZAULS



La populaziun da Brinzauls po a partir da Pasca visitar regularmain il vitg evacuà las fins d'emna.

FOTO SOMEDIA

Visitas regularas las fins d'emna

Il temp da Pasca porta bunas novas per la populaziun da Brinzauls: A partir dal venderdi sontg dasgan ils abitants e las abitantas sco er ils possessurs e las possessuras d'abitaziuns secundaras turnar mintgamai las fins d'emna en il vitg evacuà, scriva la vischinanca Albula/Alvra en ses 95avel bulletin davart la bova.

Durant la festa da Pasca vala la lubientscha per quatter dis dals 18 fin ils 21 d'avrigl, las fin d'emnas suandantas mintgamai da venderdi fin dumengia. Da star sur notg en il vitg è dentant stric-tamain scumandà. L'access sur il punct da controlla Belfort è pus-saivel da las 08.00 fin a las 18.00.

Or da motivs da segirezza ston tuttas persunas sa registrar per ina visita sur il numer da hotline 079 936 39 39. Per telefon vegnan las persunas lura mintgamai infurmadas la saira avant la visita, sche la situaziun lubescha insumma ina visita. Persunas ch'èn gia registradas na ston betg sa registrar danovamain. (cdm/rtr/fmr)

CUIRA

Novas taxas da scola

Per segirar ils lieus da scola a Tschierschen ed a Praden sbassa la citad da Cuirra la taxa da scola per uffants d'autras vischinancas. Las novas tarifas valan a partir dal proxim onn da scola. Concret paja la vischinanca da Churwalden uschia pli pauc per ils uffants da la scolina e da la scola primara che vivan a Passugg ed en il Meiersboden. Omadus lieus tutgan tar la vischinanca da Churwalden. Sco che la citad da Cuirra scriva vinavant valan las novas tarifas era per la vischinanca d'Arosa. (rtr/fmr)

GRISCHUN

Chantun e Confederaziun

averteschan dal traffic da Pasca

Sur ils dis da Pasca quintan l'Uffizi federal da vias (ASTRA) e l'Uffizi da construcziun bassa dal Grischun cun lungas colonnas e cun gronds impediments da traffic gia dus dis avant Pasca. Cun ils pli gronds impediments sur ils dis da Pasca quinta l'Uffizi federal da vias (ASTRA) en spezial sin las axas nord-sid: l'A2 dal Gottard e l'A13 dal San Bernardino. (rtr/fmr)

BUCCADAS

Fitg fraid: plets schelads

Tgi sa regorda anc dad esser restà tatgà d'enviern cun la lieunga umida ... betg vi da l'amia, mabain vi dal tschabargal da metal? L'enviern èsi magari meglier da tegnair serrà la bucca ed enserrà la lieunga. Pertege quella dovri, per exempel per discurrer. Siond conscients da questa impurtanza, din (u schevan) quels da Scuol: «Id es ün fraid chi schel-an ils plets in bocca.» Ed ils plets, quels èsi da guardar da betg laschar schelar.

Dapli datti en il tom 6 dal DRG ubain sin online.drg.ch en l'artigel «fraid».



Il Dicziunari Rumantsch Grischun (DRG) preschenta regularmain per la FMR las «Buccadas», vul dir truoglias or da ses stgazi lingüistic rumantsch.